

Soalan No: 97

**PEMBERITAHU PERTANYAAN DEWAN RAKYAT****PERTANYAAN : LISAN****DARIPADA : DR. HAJAH SITI MARIAH BINTI MAHMUD  
[KOTA RAJA]****TARIKH : 3.8.2017****SOALAN :**

**Dr. Hajah Siti Mariah Binti Mahmud [Kota Raja] minta MENTERI PENDIDIKAN menyatakan jumlah pelajar-pelajar yang terlibat dalam kes buli dan kongsi gelap dan cara mengatasinya sejak 2015 hingga kini.**

**JAWAPAN**

Tuan Yang di-Pertua,

Untuk makluman Ahli-ahli Yang Berhormat, peratusan murid terlibat dalam salah laku buli yang direkodkan dalam Sistem Sahsiah Diri Murid bagi tahun 2012 hingga 2016 adalah terkawal dengan trend yang menurun iaitu 0.08 peratus kepada 0.06 peratus. Dalam tempoh Januari hingga Jun 2017, sebanyak 0.02 peratus murid terlibat dalam gejala tersebut. Bagi negeri Sabah hanya 0.019 peratus murid terlibat pada tahun 2016 dan 0.003 peratus pada pertengahan tahun 2017. Berdasarkan rekod Sistem Pengurusan Isu Disiplin dan Pendidikan, tiada kes yang melibatkan kematian akibat perbuatan buli dalam kawasan sekolah dalam tempoh tahun 2012 hingga sekarang.

KPM tidak merekodkan salah laku kongsi gelap kerana perkara ini di bawah bidang kuasa pihak Polis Diraja Malaysia (PDRM). KPM hanya merekodkan salah laku berunsur gangsterisme. Peratusan murid yang melakukan salah laku berunsur gangsterisme yang direkodkan dalam Sistem Sahsia Diri Murid bagi tahun 2012 hingga 2016 adalah terkawal iaitu 0.07 peratus pada tahun 2012. Peratusan ini menurun pada tahun 2013 hingga tahun 2015 iaitu kepada 0.06 peratus. Walau bagaimanapun peratusan ini kemabali meningkat kepada 0.07 peratus pada tahun 2016. Trend ini menurun bagi enam bulan pertama pada tahun 2017 iaitu hanya 0.01 peratus.

Walaupun kes buli dan salah laku gangsterisme di sekolah secara relatifnya sangat kecil, namun Kementerian Pendidikan Malaysia (KPM) tidak pernah memandang ringan. Ingin tegaskan bahawa kes-kes yang terlibat telah diambil tindakan sewajarnya, sama ada peringkat sekolah mahu pun pihak mahkamah melalui Polis Diraja Malaysia (PDRM). Sejak dahulu, KPM serius menangani buli termasuk buli siber melalui mekanisme pencegahan, penguatkuasaan peraturan sekolah, intervensi kepada mangsa dan kerjasama padu dengan semua pihak yang berkepentingan serta bersedia membantu agensi berkaitan memantapkan perundangan berkaitan kes juvenil di luar sekolah.

Pihak sekolah telah diberi peringatan melalui surat-surat pekeliling dan garis panduan mencegah serta menangani buli dalam kalangan murid. Pelbagai program kesedaran gejala buli dilaksanakan secara bersepadu di dalam kurikulum, kokurikulum dan pembinaan sahsiah. Murid turut

dilibatkan menjadi pembimbing rakan sebaya melalui kelab pakaian beruniform dan Kelab Penjegahan Jenayah Sekolah. Sebagai langkah pengukuhan, Buku Panduan Pengurusan Menangani Buli di Sekolah telah diulang cetak pada tahun 2014 untuk edaran dan panduan pihak sekolah.

Dari segi penguatkuasaan peraturan sekolah, Jawatankuasa Disiplin Sekolah berperanan menjalankan siasatan dan mencadangkan hukuman atau langkah intervensi kepada pentadbir sekolah. Semua guru merupakan guru disiplin dan bertanggungjawab membentuk sahsiah murid di samping membudayakan konsep sekolah penyayang. Pihak sekolah turut mengadakan Mesyuarat Permuafakatan Sekolah melibatkan PPD, PIBG, Polis, ibu bapa terlibat dan pihak berkepentingan yang lain. Hukuman keras seperti rotan dan buang sekolah merupakan langkah akhir bagi menjaga ketenteraman sekolah.

KPM juga menyediakan prosedur dalam usaha pemulihan kepada murid yang menjadi mangsa buli. Peranan utama dimainkan oleh kaunselor sekolah dengan kerjasama ibu bapa murid terlibat. Jika kes melibatkan masalah rumah tangga, kes akan dirujuk kepada Jabatan Kebajikan Masyarakat. Setakat ini, semua murid yang terlibat dalam gejala buli berjaya dibantu untuk meneruskan pembelajaran dan mengelakkan trauma yang berpanjangan.

KPM telah menjalinkan kerjasama padu dengan pihak luar bagi mengatasi isu disiplin murid termasuk buli. Melalui Strategi Lautan Biru (NBOS), Program Remaja Berwawasan dilaksanakan dengan kerjasama Angkatan Tentera Malaysia (ATM) dan PDRM. Melalui program ini, murid berisiko tinggi akan diberikan latihan menggunakan khidmat kepakaran pegawai tentera dan polis.

Untuk makluman Ahli-ahli Yang Berhormat, isu disiplin murid termasuk buli melibatkan banyak faktor termasuk di luar sekolah. Oleh itu, mekanisme permuafakatan telah digunakan untuk melahirkan murid bukan sahaja cemerlang akademik tetapi juga mempunyai sahsiah terpuji. Peranan ibu bapa di peringkat sekolah dipertingkatkan melalui program Pelibatan Ibu Bapa dan Komuniti di peringkat sekolah. JPN dan PPD juga telah diarahkan menubuhkan Jawatankuasa Taskforce Penglibatan Ibu Bapa, Komuniti dan Sektor Swasta di semua peringkat.